

DOMENIE XXVI «VIE PAL AN»

Antifone di jentrade Dn 3,31.29.30.43.42

Signôr, dut ce che tu nus âs mandât tu lu âs fat seont une sentence vere;
o vin pecjât cuntri di te, no vin ubidît ai tiei comandaments;
ma cumò dai glorie al to non e tratinus seont la ricjece dal to boncûr.

Colete

Diu, che tu palesis la tô plui grande fuarce
cuant che tu perdonis e tu âs dûl,
fâs risinâ cence polse sore di nô la tô gracie,
par che o corìn viers di ce che tu âs imprometût
e o spartîn cun te l'ereditât dal cil.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Am 6,1.4-7

Vualtris che o vivês une vite slavrade o larês in esili.

Dal libri dal profete Amos
Cussì al dîs il Signôr onipotent:
«Puars mai lôr chei di Sion che no bacilin
e chei che si sintin sigûrs
su la mont di Samarie!
Lôr, che a stan distirâts sun jets d'avori
e a son covâts su lis lôr poltronis,
che a mangjin i agnei dal trop
e i vidieie de stale.
Lôr, che a bacanin compagnâts dal sun da l'arpe:
come David, si inventin struments di cjant.
Lôr, che a bevin tes anforis dal vin
e si onzin cul onzint plui fin,
e no si scomponin se Josef al va in sfas.
Pa la cuâl a saran menâts vie
in teste dai depuartâts,
e e finissarà la barachele dai poltrons».«
Peraule di Diu.

SALM RESPONSORIÂL dal Salm 145

R. Furtunâts i puars tal spirt.

Il Signôr al fâs justizie ai tibiâts,
ur dà il pan a di chei che a son afamâts.
Il Signôr i presonîrs al libere. R.
I vôi dai vuarps il Signôr al torne a vierzi,
il Signôr al torne a tirâ sù chei che a son par tierie,
il Signôr i vûl ben a la int juste. R.

Il Signôr al vuarde la int foreste,
al viôt dal vuarfin e de vedue,
impen che lis trainis dai triscj lis savolte.
Il Signôr al regnarà par simpri:
il to Diu, Sion, di ete in ete. R.

SECONDE LETURE 1 Tm 6,11-16

Ten cont dal comandament cence colpe, fin a la manifestazion dal Signôr.

De prime letare di san Pauli apuestul a Timoteu

Benedet, tu, om di Diu, sta lontan di chestis robis; cor daûr invezit a la justizie, a la religjon, a la fede, al amôr, a la pazience, al biel trat. Combat la buine batae de fede, cîr di cuistâ la vite eterne, che tu sêts stât clamât e che par jê tu âs fate la tô biele profession di fede denant di tancj testimonis. Ti sconzuri denant di Diu che al fâs vivi dutis lis robis, e denant di Jesù Crist che al à fate la sô biele testemoneance sot di Ponzi Pilât, di tignî cont dal comandament cence magle e cence colpe, fin a la manifestazion dal Signôr nestri Jesù Crist,

che le fasarà, tal temp destinât,
il beât e unic sovran,
il re dai rês e il paron dai parons,
l'unic che al à la imortalitat
e al vîf tune lûs che no si pò lâi dongje,
che nissun om nol à mai viodût ni mai nol podarà viodi.
A lui onôr e potence eterne. Amen.
Peraule di Diu.

CJANT AL VANZELI Lc 6,21

R. Aleluia, aleluia.

Furtunâts vualtris che cumò o vêts fan, al dîs il Signôr,
parcè che o sarêts saceâts.

R. Aleluia.

VANZELI Lc 16,19-31

Inte tô vite tu âs vude la tô part di ben e Lazar al à penât; cumò lui al è consolât e invezit tu tu sêts tormentât.

Dal vanzeli seont Luche

In chê volte, Jesù al disè ai fariseus: «Al jere un om siôr, che al leve ator vistût di purpure e di fil di lin, e al faveve fiestins ogni dì a la grande. Un puar, che al veve non Lazar, si sentave su la sô puarte a cirâ la caritât, dut fodrât di plaisir, seneôs di svuurbâ la fan cui vanzums che a colavin de taule dal siôr. Parfin i cjans a vignivin a lecâi lis plaisir. Al capitâ che al muri il puar e i agnui lu puartarin tal grim di Abram. Plui indenant al muri ancie il siôr e lu meterin sot. Lât a finîle tes inferis, framieç dai torments, al alçà i vòi e al viodè di lontan Abram e Lazar che al jere cun lui. Alore al berlà: Pari Abram, ve dûl di me e mande Lazar a tocjâ ta l'aghe la ponte dal dêt e a bagnâmi la lenghe, parcè che cheste flame mi tormenta cence padin. Ma Abram i rispuindè: Fi, impensiti che inte tô vite tu âs vude la tô part di ben, cu la cuâl che Lazar al à dome penât. Cumò però lui al è consolât e invezit tu tu sêts tormentât. In plui, fra nô e vualtris al è un grant abîs; se cualchidun di nô al ves chê di passâ li di vualtris nol pò fâlu, e cussì nancje nissun di vualtris nol pò vignî fin chi di nô. E chel altri i disè: Alore, pari, ti prei di mandâlu in cjase di gno pari. O ài cinc fradis e o volarès che ur cridas di no vignî ancie lôr in chest lûc di torments. Abram i rispuindè: A àn Mosè e i Profetis: che ju scoltin! Chel altri i replicâ: No, pari Abram; ma se cualchidun dai muarts al larâ di lôr, a cambiaran vite. I disè Abram: Se no àn chê di scoltâ Mosè e i Profetis, no si lassaran convinci nancje se un al risussite dai muarts».

Peraule dal Signôr.

Su lis ufiertis

Diu di misericordie,
danus la gracie che cheste nestre ufierte ti plasi
e nus spalanchi la risultive di ogni benedizion.
Par Crist nestri Signôr.

Antifone a la comunio cf. Sal 118,49-50

Impensiti, Signôr, de peraule che tu i âs dade al to famei,

tu mi âs dât parie ancie la sperance;
chest mi à dât confuart te mê miserie.

Daspò de comunion

Il misteri dal cil che nus ristori, Signôr,
te anime e tal cuarp, par spartî inte glorie l'ereditât
di chel che o partecipin a la sô passion e o proclamìn la sô muart.
Lui che al vîf e al regne tai secui dai secui.